



VALESIAE

ALTERA tabula, habet quoque ut prior montes & ualles atque quod plurimos amnes ex cacuminibus montium in Rhodanum stilantes. Nec putes terram istam ob id quod tota montosa est & in summis iugis montium perpetuam habet glaciem, quam incolae uocant Gletscher, sterilitate aut penuria aliqua laborare, ut non sentiat interim quoque largissimam manum dei, qui etiam ex lapidibus efficere potest panes, & ex durissimis petris educere nedum aquam uerum & uinum meracissimum, quod uerissime in hac regione impleri uidemus. Nam abundat sic uitis, arboribus, frugibus, herbis & radicibus, ut aliunde nullum inuehat comestum, sed ipsa exteris saepe ministret uictualia. Generat quoque gemmas, praesertim crystalum. Abundat feris, potissimum agocerontibus & ibicibus, quos alij Capricornos & Damas uocant. Lepores fouet plurimos, ceruos autem & apros paucos. Ursos, lupos, uulpes, martes, taxos, linceos, meles, & mustelas habet immodicos, sicut & serpentes atque colubros non raros. Est in ea arborum mira proceritas, quarum quaedam nec hyeme nec aestate comam & uirentem suam deponunt, ut sunt larices, pini & abietum uariae species. Videtur praeterea haec regio domicilium esse auium syluestrium. Nam habet copiam phasianorum, perdicum, otidum (ipsi uocant pernisi), lagaporum (uulgo *wildhüner*) quae aestate albicant, hyeme uero griseae. Habet uultures, nisos, accipitres, falcones, miluos &c. Habet & apes in plurimis locis mellificantes. Effoditur in ea ferrum, plumbum & argentum. Et ut semel dicam, habet haec uallis omnia quae usui humano sunt accommodata.